

1 Joni

Joni Pikariyikwia Mudi'nanya' Yidavakesi.

Gaalyaburi Aaya Kaavilyai, Gotiyare Yagaalyarinesi.

1 ¹Darei sinnawi kigaakuna Kwaaka dava' mima'nyawi aayawidaa'nyi mwalyaakerinesi. Sareri Nedasaabadeina wimidinoi kadika wi'norina. Sareri nemire tinna wanganorina. Sareri yawiranganorina. Sareri nemire asa mwanganorina. Sahwai Gotiyare Yagaalyai yuyagaa' yuyagaa'ne gaalyaburi aaya kaavilyarinesi. ²Gaalyaburi aaya kaavila dazahwai ku'maayabanna yima'naabina kya' nemi tinna wanganorina. Tinna wangano'na nayaa jalikurakadaa yihithadaanyi. Yuyagaa' yuyagaa'ne gaalyaburi aaya kaavilyai kigaakuna Nimwalyi ye'mwannamwalyaakelyi. Sare sai ku'maayaba neyjiwainnadaa'nyi sari tinna wanganorina. ³Sahwari tinna wanganona kadika wi'no sarina sariminyiji yihithivanigo. “Nemiji avaaizimunya ye'mwannamwalaana!” dona yihithivanigo. Nabaai nemire ye'mwannamwalya' dawesi. Nimwalyi gamire Gawaali' Jizaazai Kiraazitiyalyi nemi avaaizimunya ye'mwannamwailhoinera. ⁴“Avaazimunya ye'mwannamwalya'nevina yilaaya naanga yunebanna newarana!” dona yagaala daza' yida'manigo.

Gotiyai Baakerinesi.

⁵Yagaala da' Kiraazitiyai kaneda' kadika wi'nona yihithivanigo. Sa' dawesi. Gotiyai baakevi aaya kaavilyalyi. Sahwari jihinya maalika aane pimili' kimili' muwarikelyi. ⁶Sare'na jihinyavi kayaa'na mwaidaa kwaasi daaza' “Sahwalyi avaaizimunya ye'mwannamwailheinyi,” kwaasi yagaala dadaa yagaala nebwinna ja'neburu mivanigo. ⁷Aawa. Baakevi tewaanna mwaidevaabi' baakevi tewaanna mwalaaja'na Kiraazitiyare pwaraji avaaizimunya je'mwannamwailho. Nabaai tewaanna mwalaaja'na Gotiyare Gawaalivaangei Jizaazare taweve nemire kayaa'nanya yuyabwi nemarasi'nada tawe sahiri' girika neduimwagasi'nade'nanyi.

⁸Nemi dinyina “Nimi kayaa'nanyabwi maayainyira,” dinaaja' simunyangi kwaasi yawi'daanyainera. Sarevi nebulya' nemire simunyangi wilanewa'de' mi'. ⁹Nemire kayaa'nanyanna jalikurakinaaja' Gotiyai “Kumire kayaa'nanya marasi'nima! Kumire girikita'nanya yuya, yi yida'maraangebwi maaya yuyabwi duimwagasi'nima!” dozi “Kayaa'nanya marasi'nideinyi,” dinike'na nayaa limwannikei, yida'maraangei mwaalikei sara yadelyi. ¹⁰Nabaai Gotiyai nedini' “Yuyaihi kayaa'nanya yigasaihilyi.” Sarevidaa'nyi nemi “Kayaa'nanya migeinyi,” dinaaja' Gotiyarina dina “Sahwai kwaasi yagaala dadelyi.” Nemi kwaasi sara daaza' gamire yagaalya' nemire simunyavi wilanewa'de' mi'.

2 ¹Nemire kaimiraaya maalikeihi, yagaala daza' pikarya yihithawasivanaabihe. Sarimi kayaa'nanya mipine'na “Wijiwaakima!” dena yihithawasivanaabihe. Sare' kiri' a'mwe pwai kwai kayaa'nanya' yaja' neminyine kayaa'nanyanna Nimwari marewidadei mwaali'. Sahwai Jizaazai Kiraazitiyai yida'maraangelyi. ²Sarei nemire kayaa'nanyanna Gotiyari sinna tika wida'dewwi mubamarasi'nya'nei balakelyi. Nemirena gavenna mi'. Aawa. Kwaaka yuya davakiyaraavine kayaa'nanyannanyira.

Gotiyai neminyina dinikeji kale wia'nebulyi midinya'nesi.

³Naangere kiwinyanna midinaaja da'na nebulya'na nayaa dara yawi'daanyi “Kiraazitiyari nayaa yawi'manigo. Sahwareinera.” ⁴Nabaai pwai dina “Nimi Kiraazitiyari nayaa yawi'dinyainyi.” Dina yaja' kiri' Kiraazitiyare kiwinyanna mamidinya dazai Kiraazitiyarina kwaasi yagaala dadelyi. Gotiyare nebulya' gamire simunyavi wilawa'de' mi'. ⁵⁻⁶Aawa. A'mwe gazaizai gamire yagaalya' mididere simunyavi yunebanna Gotiyare yilaaya wia'nebwi wilawa'devulyi. A'mwe pwai dina “Nimi Kiraazitiyari wilamwaaihe.” Dina yadei nabaai sawhai mwaalakabaaibi' sara mwaalana! Sara yade darevi nebulya'na nayaa dara yawi'daanyi “Kiraazitiyari wilamwaaali'.”

⁷Nyivu'nadeihi, kiwinya mudike' pikarya yihithawasivanaabihe' mi'. Aawa. Kiwinya aya' sinnawi sagaa' dinike' sarimi maaresasi. Naangeri limwagesagaa' yagaala daza' mena kadika wi'nesasi. ⁸Kiri' kiwinya sa' mudike' pikarya yihithawasivanaabihe. Sabwina Kiraazitiyai mwaalya tewaanyabulyi sarimi mwaalya tewaanyabulyi yawirangadaa dara dadaanyi “Kiwinya sa' nebulyasi.” Nabaai dara dadaanyi “Yithaanyi, Kiraazitiyare baaka nebulya' mena wannadaa'nyi jihinya' yimaanivani'.”

⁹Pwai “Nimi baakevi mwaaiheinyi,” dina yada kiri' gannya gya'mwerina sinna tika wida'daa'nyi yi a'mwe dazai jihinyavi kuna mwaalikegaa'nanyi. ¹⁰Pwai gannya gya'mwerina kale wiadei dazai baakevi mwaaidelyi. Sahwai tewaanna yada baakevi pwai midihwaki'nariwakabaaibi' kayaa'nanya myada kayaaka migalyadelyi.

¹¹Aawa. Gannya gya'mwerina sinna tika wida'dei jihinyavi mwaaida jihinyavi yamaryadelyi. Jihinya' gamire tinnyaraari mena wijinnamaaraja'na tusavina yiraataatakaanya wodelyi.

¹²Nimire kaimiraaya maalikeihi, Kiraazitiyarina (gamire yayavina) Gotiyai sarimire kayaa'nanya mena marasi'nake'na yagaala da' pikarya yihithawasivanaabihe'nanyi. ¹³Nimwaravaavihi, sinnawi kigaakuna aayawidaa'nyi Naangei mwaaida kuna mwaalikeri nayaa yawirangamwaasa'na yagaala da' yihithawasivanaabihe. Miginyaihi, Kayaa'nanaangei Saataanimi mena dathiwamwaasa'na yagaala da' yihithawasivanaabihe.

¹⁴Kaimiraayamiliki, Nimwari nayaa yawirangamwaasa'na yagaala da' yihithawasiwaabe. Nimwaravaavihi, sinnawi kigaakuna aayawidaa'nyi mwaaida kuna mwaalikeri nayaa yawirangamwaasa'na yagaala da' yihithawasiwaabe. Miginyaihi, diraginyaihi mwaaidivi' Gotiyare yagaalya' sarimire simunyavi yuna wilayihimwaaidi'nyi Kayaa'nanaangeri mena dathiwamwaasanna yagaala da' yihithawasiwaabe.

¹⁵Kwaakevakiya sabwina mihivu'nannera! Nabaai Kwaakevakiya sanna mihivu'nannera! A'mwe pwai kwai Kwaakevakiya sabwina wivu'najai gannya simunyavi Nimwarina nayaa wivu'nya'ne' mularikelyi.

¹⁶Kwaakevakiya yuyanna, kilaakevine dika widadevulyi a'mwera tinna wangadivisanna "Maa'mujainyi," yawi'divisasi kunnya yaya munyaba makinadivitara "Gilyivisanna nimeinyira," yawi'divisasi yuya sazanna Gotiyaryabadaa'nya mi'. Aawa. Kwaakevakiya saburidaa'nyangira.

¹⁷Kwaakevakiya sabwi mena yimaanyina yivanikebulyi. Dika widade sabulyi mena yimaanyina yivanikebulyi. Kiri' Gotiyare simunyabwi midinajai yuyagaa' yuyagaa' mwaalagotherlyi.

Kiraazitiyari Yikamaangerinesi.

¹⁸Kaimiraayaihi aayagaa'ne' aya kiba warikegaaki. Kigaa' dara wi'nesaihilyi "Kiraazitiyarine Yikamaangei yima'naabathelyi." Sara wi'netabaai'bi' dahaa' Kiraazitiyarine yikamaanga kwalaalyara mena yima'niwaa'. Sarevidaa'nyi yawi'mwo "Aayagaa' aya kiba yima'niwakegaaki." ¹⁹Yikamaanga sahwaru mena neyagalya'ma'mwaa'. Sarera nemirera mika! Sare' dare'nesi. Nemirera nebwinu mwaabizi kwaji nemiji kuna ye'mwannemwaina kipidika! Kiri' Gotiyai neminyina " 'A'mwe yuya dazara nemirera mi', yawipika!" kada' mena neyagalya'ma'mwaa'. ²⁰Sarimi yikamaangerabisaihi mi'. Saihire simunyangi Gotiyare Kuryai wilayihimwaa'li'na yuyaihi nebulya' simunnakeihilyi. ²¹Sare' sarimi nebulya' myawirivanigasa'na pikarya da' midayiwa. Aawa. Saihi nebulya' yawi'divisa'na yida'mwa. Nabaai "Kwaasi yagaalya' nebulyavidaa'nya' mika!" yawi'divisa'na yida'mwa.

²² A'mwe kwaasi yagaala dadei aaihwilaka? A'mwe dazai yi, dara dadelyi “Jizaazari Gotiyai dahilakaka maryasaabakei mika! Kiraazitiyai mika!” Yi dazai kwaasi yagaala dadelyi. Sara dade'na Kiraazitiyarine yikamaangelyi. Sara dadei Nimwarinaji Gawaalikinaji “Aala!” yawi'delyi. ²³ Gazaizai Gawaalikina “Aala!” yawirajai Nimwai kwarinaji “Aala!” yawi'delyi. Nimwalyiyai mika! Pwai a'mweraayaba Gawaalikina “Gotiyai dahilakaka maryasaabakelyi. Kiraazitiyalyira,” dazai Nimwalyi Gawaalisi saraalyiyalyira.

²⁴ Saihi yagaala sinnawi sagaa' kadika wi'neve daza sarimire simunyangi kuna wilayihwarana! Sinnawi kadika wi'neve daza sarimire simunyangi kuna wilayihwaraja sarevidaa'nyi Gawaalikiji Nimwariji kuna dulawimwaalyideihilyira. ²⁵ Nabaai dare! Kiraazitiyai yagaala yune naanga nebulya'na dara neda! “Yuyagaa' yuyagaa'ne gaalyabwi yihizaavideihilyi.” ²⁶ Kwaasi yihithipijaraavina pikarya daza yida'mwengi. ²⁷ Sarimire simunyangi Kiraazitiyai gannya Kurya Tewaanyari kulayihimwaa'ha' kuna wilayihimwaa'li. A'mwe pwara mihiwirivaniga!. Myihigainyadeihilyi. Aawa. Sarimire simunyangi Kurya Tewaanyai wilayihimwaa'likei yuyanna yihiwirivani!. Kurya dazahwai yihiwirivanike' nebulyasi. Kwaasi yagaalya' mi!. Kuryai wilayihimwaa'likei yihiwiryakabaabi! Kiraazitiyari kuna dulamwaalyila! Sarevidaa'nyi sara jila!

²⁸ Sarevi kaimiraaya maalikeihi kuna dulamwaalyila! Sahwai Sigunyavidaa'nyi ku'maayabanna yima'naabathehaa' “Gaminyaba diraginna davaana!” dapi Kiraazitiyari kuna dulamwaalyila! Yi'mavaabathevi gaminyina lika myadaa wagila mamaryadaa magwamwannanne'na sahwari kuna dulamwaalyila! ²⁹ “Sahwai yida'maraangelyi,” yawi'divisavidaa'nyi “Gazaizai yida'maraangebwinna yajai Gotiyare kaimiraayai mwaalikelyi,” yawirangabineihilyira.

Gotiyare kaimiraayainaavinesi.

3 ¹ Yithaanyi! Nimwai neminyine kale naanga wiwakelyi. “‘Nimire kaimiraayara,’ dima!” daka Kiraazitiyari limwadaanyainaavina kale naanga wideine. “Gotiyainyire kaimiraayarera,” dake' nebulyasi. Gamire kaimiraayainera. A'mwe Kwaakevakiyabwinera Kiraazitiyarina myawiryasavina “Gamire kaimiraayarera,” maneyawirivaniga!. ² Nyivu'nadeihi, dahaa' nemi Gotiyare kaimiraayaine. Divi nemi bewarabisaina yima'nabaatheinaavaka? Sa' myawiranganyaine. Kiri' nemi dara yawi'manigo. Divi sagaa' Kiraazitiyai ku'maayabanna yima'naabathehaa' gami sahwaibi' yima'naadeine. Sagaa' dara wanganaadesi. Ai, Kiraazitiyai sasarei daaka! Sara Kiraazitiyari nayaa yawiranganawaajiyana sahwaibi' yima'naadeine. ³ Nabaai sai tewaanyai girikita'nanya maayai mwaalikabaabi! a'mwe gazaizai sahwarina sara yemwaa'likei Kiraazitiyarina tewaanyai yima'nivanikelyi.

⁴Gazaizai kayaa'nanyabwi yadei, Gotiyare kiwinya dinike' galazekivaidelyi. Kayaa'nanya sabwi kiwinya dinike' galazekivalyabulyi. ⁵Nemi yawi'manigo. "Sai kayaa'nanyabwi makwawana!" kada' sahwari wijiwaainakelyi. Sahwari kayaa'nanyabwi yuna muwarikelyi. ⁶Sarevidaa'nyi sahwari gazaizai wilamwaaidei kayaa'nanya sabwi yadei mi'. Gazaizai kayaa'nanyabwi yadei sahwari yawiranganna yikei mi'. Sarina simunnakei mi'. ⁷Nimire kaimiraaya maalikeihi, aane pwai kwai sarimire simunyangi kwaasi nabayihithathika! Mala nayaa jiwannyila! Yida'maraangebwin yadei sai yida'maraangelyi. Sahwai yida'maraangei mwaalikabaaibi' sai yida'maraangelyi. ⁸Kayaa'nanyabwina yadei Kotiya Maryaderelyi. Sinnawi kigaakuna Kotiya Maryadei kayaa'nanyabwi yike'na Saataanimirebwina kayaa'nanyabwi avaina yadei Saataanimirelyi. "Kotiya Maryadei Saataani kayaa'nanya yadengi kayaaka yigalasi'nima!" daka Gotiyare Gawaalivaangei ku'maayabanna walaabakelyi. ⁹Gazaizai Gotiyarei yima'najai kayaa'nanyabwina yadei mi'. Gamire simunyavi Gotiyare mwaalyabwi wilamwaa'like'na sahwai kayaa'nanyabwina yadei mi'. Gotiyarei mwaalike'na sahwai kayaa'nanyabwina kuna yannei mi'. ¹⁰Nabaai yawiranganaaja' "Gotiyarei aihwai dingaka? Kotiya Maryaderei aihwai dingaka?" nemi dara yawiraade'nanyi "Gazaizai yida'maraangebwi mi yajai sai Gotiyarei mi'. Nabaai gya'mwerina tewaanya kale mwiadei sai kwai Gotiyarei mika!"

Neyamweraavina kale yabwines.

¹¹Sinnawi aayawidaa'nyi sarimi yagaalya' kadika dara wi'nesa'nanyi "Neyamweraavina tewaanya kale neyadeine. ¹²Kenibi' mamwalaannera!" Sai Kayaa'nanyarei mwaalaka gannya gahwaalaangeri tamakyaakelyi. Be'na tamakyaakalaka? Sarei kayaa'nanya' yadaa'nyi gahwaalaangei yida'maraange' yaake'na similika wimwaa'ina kyaa' tamakyaake'nanyi. ¹³Nya'mweihi, sarevidaa'nyi sarimi yida'maraangebwi yivanigasa'na Kenibitara a'mwe Kwaakevakiyabwinera sariminyina similika wimwaa'like'na atika mamaru'napina!

¹⁴Nemi yawi'manigo. Neyamweraavina kale neyivanike'na dara yawi'manigo. Dikevi marasi'nya'ne sabwi mena baryabwi yagalya'ma'mwona. Sara yona gaala saburi mena wilamwaa'ih. Kale mwivanikei Dikevi marasi'nya'neburu barya saburi kuna wilamwaa'li'. ¹⁵Gazaizai gya'mwerina similika widei sahwai a'mweraavi tamakadelyi. Nabaai sarimi yawi'maniga' "A'mwei pwaraavi tamakadei gamire simunyavi yuyagaa' yuyagaa'ne gaalyabwi wiwa'dei mi'." ¹⁶Kale wia'nevine kaavilya' yawi'mwo daresi. Sai gannya mwaalyabwi yagalya'mavakelyi neminyineba. Sarevi neminyina kale wia'nebwina yawi'manigo. Nabaai sarevi nemi kwainaji neyamweraavineba nennya mwaalyabwi yagalya'mavaanneinera. ¹⁷Sare' kiri' pwai Kwaaka davakiya

mwaalya'ne kininnakei mwaalajai nabaai gya'mweri wimudasadaawori tinna wanganna yoji kiri' gya'mwerina simunya' tihi'na yoji sawware simunyavi Gotiyarine kale wia'ne' gara wiwarika! ¹⁸Nimire kaimiraaya maalikeihi, kale wia'ne'na neya'mweraavi yune yagaalyanna nudaathika! Yune maangi'na nudaathika! Aawa. Neminyi kale neyadaawori sawwaraavi tewaanna yadaa wigaimwagaana! Nebwina wigaimwagaana! Wimudaasivanike duzaayila!

Kiraazitiyari limwadivisara Gotiyarina lika myadivisaraavinesi.

¹⁹Sareina kale wia'neina sasare saburi yawiraade “Nebulyavidaa'nyainyi. Gotiaryaba nimire simunya' kavena waradeinyi. Nimire kayaa'nanyanna myawirivanigeinyi.” ²⁰Sa' dare'nanyi. Nemire kayaa'nanya mena marasi'nyagaa' nemire simunyangi “Nimi kuna kayaa'nanyainyi,” yarai kwaasi yawiraajahaa' Gotiyai yuyangina yawirangadei nemire simunya wawilawakadei yawi'na “Gimire kayaa'nanya sa' mi'na marasi'neneinyi.” “Marasi'neneinyi,” sara yawi'na yade'na nemire kayaa'nanyanna myawiraanneine. Nemire simunya kavena waradesi. Nabaai sara yawi'de'na “Nebulyavidaa'nyaine,” yawiraadeine. ²¹Nyivu'nadeihi, sarevidaa'nyi nemire simunya kayaa'nanya sanna myawiri yaaja' Gotiyarina diraginna da'daanyi. ²²Nabaai gamire kiwinya dinike kuna mididaa yilaaya wivu'nadenna yadaanya'na yuya pininna yidanganaaja' sawwai wijaavina neyadelyi. ²³Gamire kiwinya dinike' daresi. Nyibwaalivaangei Jizaazai Kiraazitiyari limwabizaihilyi. Kiraazitiyai sara yihithakabaabi' “Sariminyi pwara pwaraavina kale yihyana!” sara jila! ²⁴Nabaai gamire kiwinya dinike midimanikei Gotiyari kuna wilawimwaaidelyi. Nabaai Gotiyai a'mwe sawwari kuna wilawimwaaidelyi. Gotiyai gannya Kuryai nejaavake'na Kuryai neyibwaridaakwada da'na yawi'daanyi “Gotiyai wilanemwaalikelyi.”

Gotiyare Kuryarinaji yimakei kwaasi widaderinajiyane.

4 ¹Nyivu'nadeihi, a'mwe kwalaalyara kwaasi dadivi' “Gotiyare Kuryai simunyavi nyidada yihiziwaakivanigeinyi.” Sara dadivi' Kwaakevaki walyuna yadivi' yaasiwa'na kwaasi wijiwakamarivanigasavidaa'nyi yuyara “Kuryai kininnakeinyi,” yihithadivisaraavi yaasiwa'na malimwabina! Aawa. “Gotiyai gannya Kuryari wijaavakei dingaka? Kuryari mujaayakei dingaka?” dapiji kumire kurya sawwaraavi yaamiji jawibwarila! ²Yawibwata sare' daresi. “Gotiyare Kuryai kininnakei daaka?” dapiji dara jawiranganyide. “Jizaazai Kiraazitiyai kilaa'nakei yima'naabakelyi,” jalikurakadei yi sawwai Gotiyare Kuryai kininnakelyi. ³Gazaizai Jizaazai kilaa'nakerina sara majalikurakivanikei Gotiyare Kuryai kininnakei mi'. Sawwai yimakei kininnakelyi. Kiraazitiyarine

Yikamaangerelyi. Mi'na dara wi'nadivi' "Kiraazitiyarine Yikamaangei yima'naabathelyi." Dahaa' yimakei kininnakera kwaasi wijiwaakadivitera mena mwaaleva Kiraazitiyari Yikamaangere simunya yawi'divisare.

⁴Nimire kaimiraaya maalikeihi, sarimi Gotiyareihilyi. Kwaasi wijiwaakadivita sahwaravi sarimi mena dathiwamwaava. Kuryai wilayihimwaalika dazai a'mwe Kwaakevakiyabwineraavi Kayaa'nanyai wilamwaalikeri wavilavikelyi. Sare'na wavilavikere diraginya' maareva mena dathiwamwaava. ⁵Kwaasi wijiwaakadivita sahwaru Kwaaka dazavakiyabwineraavirerera. Sarevi kumire yagaalya' yune Kwaaka savakiyabwinesa. A'mwe Kwaaka savakiyabwinera yagaala sa' kadika wi'nadivisare. ⁶Nemi Gotiyareinera. Gotiyari yawirangadei dazai kadika newi'nadelyi. Gotiyare'i mamwaalyikei kadika newi'nadei mi'. Sarevidaa'nyi dare' yawi'daanyi "Newi'nadei sahwai Nebulya'ne Kuryai kininnakelyi. Manewi'nyadei sahwai Kwaasi Dadei Kayaa'nanyai kininnakelyi."

Gotiyai neminyina kale naanga wiadevwinesa.

⁷Nyivu'nadeihi, kale wia'nebwi Gotiyaridaa'nya'na neminyi pwaraavina kale neyana! Gazaizai gya'mweraavina kale wiadei sai Gotiyare'i mwaalikelyi. Gotiyari nebulyava'na yawirangadelyi. ⁸Kale mwia'nei Gotiyari myawiranganyikelyi. Gotiyai, kale wia'neburu aaya kaavilyalyi. Sare'na sai Gotiyari myawiranganyikelyi. ⁹Gotiyai yawi'na "Nyibwaalikina a'mwera gaalyabwina mwaabika!" daka gannya Gawaalivaangei gave pwainanyari Kwaakevakina maryasaabina yakelyi. Sarevi dare' yawi'daanyi "Ai, Gotiyai neminyina kale naanga wike' ku'maayabanna yima'naabakesi." ¹⁰Kale naanga wia'nebwi da'darebwinanyi. Neminyi Gotiyarina tewaanya nevu'nadevwi mi'. Aawa. Sahwai neminyina kale naanga kwia' nemire kayaa'nanyanna Gawaali' Gotiyari sinna tika wida'devwi mubamarasi'nya'nei balya'neri maryasaabakebulyi. ¹¹Nyivu'nadeihi, Gotiyai neminyina kale naanga sara wiakevidaa'nyi nabaai saina neya'mweraavina pwai pwarina kale neyanneine. ¹²Gotiyari tinna wangadei a'mwei aane pwai kwai mi'. Sare' kiri' saina neya'mweraavina pwai pwarina kale neyajainaavi Gotiyai kuna wilanemwaalikelyi. Nemire simunyavi yunebanna gamire kale naanga wia'nebwi naanga yune nebulya'nanyabwi wilanewa'devulyi.

¹³Gannya Kuryari nejaavike'na dare' yawi'daanyi "Sahwari kuna wilamwaa'ho. Neminyi kuna wilanemwaali'." Yi sasarevinyi. ¹⁴Nemi sahwaina tinna wanganibainona jalikurakivanigo. Nimwai Gawaalivaangeri maryasaabakelyi Kwaakevakiyaraavine padaihasamaa'deri. ¹⁵Gazaizai jalikurakina "Jizaazai Gotiyare Gawaalivaangelyi," yi sara jalikurakina yajari Gotiyai kuna wilamwaali'. Nabaai Gotiyari sahwai kuna wilamwaali'. ¹⁶Sare'na yawiralimwadaanyi "Gotiyai kale naanga neminyina diraginna wiadelyi."

Gotiyai kale wia'neburu aaya kaavilyalyi. Kale wia'neburu wilamwaalikei Gotiyari wilamwaalikelyi. Nabaai sahwari Gotiyai wilamwaalikelyi. ¹⁷Neminyina “Wirivikiryane naangedaa' yirika sariki kumi lika myadivi' diraginna daapika!” daka nemire simunyavi yunebanna Gotiyare kale naanga wia'nebwi naanga yune nebulya'na wilanewa'de'nanyi. Kiraazitiyai Gotiyari wilamwaalikabaabi' Kwaaka davaki Gotiyari wilamwaaiho'na lika myadaa diraginna davaadeinera. ¹⁸Gotiyari kale wia'neburu lika myadaanyi. Aawa. Kale mena wia'nebwi nemire simunyavi naanga yune nebulya'na wilanewa'de' lika ya saburi marasi'desi. Lika ya'ne kaavilya' daresi. Nimire kayaa'nanyanna nyirivikirade'na lika yiwana! Sarei lika yadere simunyavi yunebanna Gotiyare kale naanga wia'nebwi naanga yune nebulya'na mularyade'nanyi.

¹⁹Sinnawi Gotiyai neminyina kale naanga wike'na nemi tewaanya nevu'nadeine. ²⁰A'mwe pwai kwai widina “Gotiyarina tewaanya nyivu'nadeinyi,” dazai nabaai gya'mwerina similika wimwaalikei kwaasi yagaala dadelyi. Sare' dare'nesi. Sahwai gya'mweri tinna wangaderina kale mwivanikei Gotiyari tinna mwanganyaderina tewaanya gara wivu'nannelaka! ²¹Kiwinya dinika da' Kiraazitiyai dare' neda' “Gotiyarina tewaanya wivu'nadei gya'mwe kwarinaji kale wiana!”

5 ¹Gazaizai “Jizaazai sahwai Gotiyai dahilakaka maryasaabakei Kiraazitiyalyi,” limwadei dazai Gotiyaridaa'nyalyi. Nabaai gazaizai ganimaangerina wivu'nadei gamire kaimiraayarina wivu'nadelyi. ²Nemi Gotiyarina tewaanya nevu'najaina gamire kiwinya dinike mididaanya'na dare' yawi'daanyi “Sareina Gotiyare kaimiraayaraavina tewaanya nevu'nivanikeine.” ³Sare' dare'nesi. Gotiyarina tewaanya wivu'nya'nebwi da'darebwinesi. Gamire kiwinya dinike mididaanya'nanyi. Nabaai gamire kiwinya dinike taanginya maayangira. ⁴Sarevidaa'nyi gazamilisamili' Gotiyare kaimiraayamili' yima'najamili' Kwaakevakiya sabwi dathiwamanikemilikira. Kwaakevakiya sabwi dathiwangebwi da'darebwina. Gawaalivaangeri limwadaanya'nanyi. ⁵Kwaakevakiya sabwi dathiwamanikei aaihwala? Dazai dare' limwadelyi “Jizaazai Gotiyare Gawaalivaangelyi.” Sarei gavelyi.

Jizaazai Kiraazitiyarina jalikurakya'nebwinesi.

⁶Dazahwai Jizaazai Kiraazitiyai aalyavi bavitaaziya yavinesi gamire tawe' walaabaka balakevinesi Sigunyavidaa'nyai walaabake'nanyi. Yune aalya wivaihya sabwinevina walaabakei mi'. Aawa. Aalyavinebwinaji tawevinebwinaji walaabakelyi. Kuryai nebulyavi aaya kaavilyarine'na Kurya sahwai yagaala sa'na jalikurakadelyi. ⁷Jalikurakya dawaai data warikennanyi. ⁸Yi pwai Kuryai, yi piri' aalya', yi piri' tawe'. Dawaai data sa yagaala gave piri'nanya' jalikurakadesi. Jalikurakya sa' daresi. Jizaazai Gotiyare Gawaalivaangelyi. ⁹A'mwera jalikurakipija' “Nebulyasi,”

dadaanyi. Yithaanyi! Gotiyai jalikurakya' a'mweraavirevi wawilavikesi. Sarevidaa'nyi Gawaalivaangerina Gotiyai nejalikurakade' nebulyasi. Gotiyare jalikurakya dare'nanyi. Jizaazai Nyibwaaalivaangelyira. ¹⁰ Gotiyare Gawaalivaangeri limwadei gamire simunyavi jalikurakya sa' wiwarikelyi. Gotiyarine! malimwagyadei dadelyi "Gotiyai kwaasi yagaala dadelyi." Gotiyai Gawaalivaangerina "Niminyidaa'nyalyi," jalikurakya' malimwagyade'na dadelyi "Kwaasi yagaala dadelyi." ¹¹ Jalikurakya daresi. Gotiyai yuyagaa' yuyagaa'ne gaalya'nebwi nejaavakesi. Gaalya'ne saburi kaavilya' Gawaalivaangeri wilawiarika. ¹² Sarevidaa'nyi Gawaalivaangei kininnakei gaalya'ne sabwi kininnakelyi. Gotiyare Gawaalivaangei maayai gaalya'ne sabwi maayalyi. ¹³ Yagaala daza yihithawasiwaabe. Gotiyare Gawaalivaangeri limwadivisaihi "Yuyagaa' yuyagaa'ne gaalya'ne sabwi kininnakeine,' dipika!" dena yihithawasiwaabe.

Yagaala aayannesi.

¹⁴ Gotiyaryaba diraginna da'daa widadaanya da'daresi. Gotiyai simunya yawi'devina yidanganawaajiya piri' kiri' kadika newi'nada sara yaderinera. ¹⁵ "Yidangananne kadika newi'nadelyi," yawi'manigovi kirivinjaji yawi'manigo. Sahwari yidangadaanya mena maa'mwona. Diraginna yawi'mwona. Sare' nebwi nejaavadelyi. ¹⁶ A'mwe pwai kwai dara wanganaja' "O, nya'mwei Kiraazitiyarei kayaa'nanya' jivanika! Kayaa'nanya sa' sahwari Dikevi marasi'nya'ne' daaka!" Sara wanganaja' Gotiyari kidaanganaji marasi'noji gaalya'ne' tewaanna wijaavadelyi. A'mwe kayaa'nanyanna Dikevi mamarasi'nya'ne yipijaraavina yihithiwa. Sare' kiri' kayaa'nanya pibwi Dikevi marasi'nya'nebwi wari'. Dazahiri'na jithaanganyide'na mihizivanige. ¹⁷ Yuya yida'maraangebwi kayaaka yigaide sabura sa kayaa'nanyabulyi. Kiri' kayaa'nanya pini a'mweraavi Dikevi yuna mamarasi'nya'ne wari'.

¹⁸ Nemi yawi'manigo. Gazaizai Gotiyare kaimiraayai mwaalajai kayaa'nanyabwi mididei mi'. Aawa. Sahwari Gotiyaridaa'nyai nayaa maremwaalikelyi. Sarevidaa'nyi Kayaa'nanyai sahwari limwagathei mi'.

¹⁹ Nemi yawi'manigo. Gotiyareina mwaaiho. A'mwe Kwaaka yuyavakiyabwinera Kayaa'nanyari wilakasarera. Sahwai maremwaalikere.

²⁰ Kiri' nemi yawi'manigo. Gotiyare Gawaalivaangei bakei simunya tewaanya' nejaavikelyi. "Gotiyai Nebulyari yawiralimwabika!" daka simunya' nejaavikelyi. Nebula Sahwari wilamwaaiohine. Gawaalivaanga Jizaazai Kiraazitiyari wilawimwaaioh'nanyi. Sahwai Gotiya nebulyalyi. Sahwai yuyagaa' yuyagaa'ne gaalya'neburu aaya kaavilyalyi.

²¹ Nimire kaimiraaya maalikeihi, a'mwa'mwe kwaasigotiyaraavina dameihi dithaayila! Sahwaraavi yilaaya mipinera!

Joni